

Begrüessig für gladeni Gescht Pilzusstellig 21./22. Septämber 2024

Liebi Gescht, liebi Sponsore, liebi Mitglieder u Ehremitglieder u Fründ vom Pilzverein

Äs isch mir ä grossi Fröid u Ehr, öich hie ir Burgseelihalle in Ringgenbärg zur Pilzusstellig z begrüesse. I däm Jahr fire mir äs ussergewöhnlichs Jubiläum – üse Pilzverein wird stolzi 85 Jahr alt! Ä Alass wo üs nid nume mit Stolz erfüllt, sondern o Glägeheit bietet, uf ä längi u erfolgrichi Vereinsgschicht zrüg z luege.

Vor 85 Jahr hei sich passionierti Pilzliebhaber zäme gschlosse um iri Lideschaft für Pilz mitenand z teile, ires Wüsse z erwidere u dr Schutz vor heimische Pilzwält z fördere. Was vor Jahre ire chline Rundi agfange het, het sich über d Jahrzehnt zumne Verein entwickelt, wo wiit über üsi Region use bekannt isch. Üsi Mitgliederzahl isch gwachse u üses Engagement für d Natur u d Pilzkund isch ungebroche.

Die Usstellig isch äs Spiegelbild vo üsere Lideschaft. Sie bietet nid nume ä faszinierende Iblick id Vielfalt vo de Pilz wo üsi Wälder u Matte tüe berichere, sondern o id Arbeit u s Wüsse, wo üse Verein über all di Jahr gsammelt het. Vo sältene Arte bis zu kulinarische Schätz – hie isch für jedi u jede öppis derbi!

Ä so nes Ereignis wär ohni di grosszügegi Unterstützig vo üsne Sponsore nid möglich. A dere Stell äs riesegrosses Merci vielmal! Uf dr Sponsorentafele si üsi Sponsore ersichtlich. Öii Unterstützig treit entscheidend derzue bi, dass mir die Usstellig i dere Qualität und dere Vielfalt dörfe präsentiere. Ihr hälft üs, d Faszination für d Pilzwält bekannt z mache u üses Wüsse a kommendi Generatione wieter z gä.

O üsne tröie Mitglieder u ehreamtleche Hälferin und Hälfer äs grosses Merci vielmal! Öii unermüdelechi Arbeit, öii Higab u öii Liebi zur Natur mache üse Verein lebändig u erfolgrich. Gemeinsam hei mir üse Verein zu däm gmacht, was är hüt isch – ä Ort vor Begägnig, vom Ustusch u vom gägesitige Wüsse wieter gä.

Löt üs dä bsundrig Tag gniesse u üs ar Pilzvielfalt erfröie u ds Wüsse, wo üs alli verbindet, wieter z träge. Mög üse Verein no vili Jahr wachse u gedeihe.

I däm Sinn wünsch i öich allne a spannendi u unvergässlechi Zyt a üsere Usstellig. Im Abschluss a Rundgang fröie mir üs, gmeinsam uf nes erfolgrichs Jubiläumsjahr azschtosse.